

Date – 01/08/2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

1. Home Minister K Sapdangan tunhnaia Mizoram leh Assam ramri, Vairengte Sabual muala Assam Police ten kawng an laih chu tihtawp tir nghal a ni a ti.
2. TB Elimination Acceleration Project hnuaiah Lungleiah a thlawna inentirna hun hman a ni.
3. Union Finance Minister Nirmala Sitharaman-i chuan Union Budget 2024-25 chuan hmasawna leh inrenchemna inbuktawk takin a kalpui a ti.
4. Union Public Service Commission-UPSC chuan dawta a nihna phuahchawp IAS training lai Puja Khedkar chu a ban bakah exam thei tawh lo turin a hrem.

<><><>

### HOME MINISTER

Home Minister K Sapdangan tunhnaia Mizoram leh Assam ramri, Vairengte Sabual muala Assam Police ten kawng an laih chu tihtawp tir nghal a ni a ti.

He thu hi nimina thuthar lakhawmtu thenkhat ten a pisaa an kawmna ah Home Minister hian sawiin, Kolasib Deputy Commissioner leh Cachar DC te an in be pawp nghal, a ti a, Pu K Sapdanga chuan kumin June thla-a ruahsur nasa avangin ramri a Assam Police-in camp an siam na border post kalkawng a min a, July thla tir atanga kawng min te chu an thianfai tih a sawi a, Home Minister chuan kalkawng min thenfai pah a kawng sial a awm thu chu a hmun ngeiah Vairengte Civil SDO leh SDPO ten kal chilh a an en nghal a, Kolasib DC a report an thehluh bawhzui a Cachar DC biak pawh a nih hnuaah Assam Police te hmalakna hi tih tawp nghal a nih thu a sawi.

Home Minister chuan State pahnih Chief Minister-te lo inbiak tawhna angin thlathar mai ah hian ramri chungchang titi hona Aizawl ah neih a ni dawn tih sawiin, tun hnaia thil thleng chu DC leh DC indawrna level ah sawi fel mai a tawh rih ni a an hriat thu a sawi a, State pahnih te inbiakna tur chungchang hian State pahnih Chief Minister ve ve ten an aiawh a a changtu Minister te inbiakna neih nise an tih angin, Mizoram lam atangin amah Home Minister hova Revenue Minister leh dept official dangte an tel tur thu leh

sawihho tura chhawpchuah tur hrang hrang te chu dept official lamten an buatsaih tur thu a sawi bawk.

Nimin vek khan MZP Gen Hq hruaitute chuan, Assam leh Mizoram ramri, Assam-in hmatar an lakna hmun Vairengte Aitlang an tlawh a. Assam Police-in an camp panna kawng an laih avanga Mizoram chhunga kut thlakna thar nia lang chu a hmunah an en a ni. MZP Headquarters Kolasib, MZP Sub-Headquarters Bilkhawthlir leh MZP Sub-Headquarters Vairengte te'n an tawiawm bawk a ni.

MZP te hian Vairengte Joint YMA leh Joint VC hruaitute nen Joint meeting neih puin, he inkawm khawmna ah hian MZP hruaitute chuan; ralkhat atanga thlir ringawt lo a khawtlang hruaitute atang ngei a thil chiang zawk hriat an tum vanga kal an ni tih an sawi a. Vairengte khawtlang hruaitute chuan an camp panna kawng motor tlan theihna tura blacktop emaw block phah a nih ve loh thu leh awlsam taka kal zung zung theih ala nilo chu chak zawka siam anih theih nan sorkar nawr turin MZP hruaitute an lo hrih a ni.

MZP hruaitute chuan, tun hnaia social media a video viral a, Assam Police in an camp panna kawng motor luh theih nana an laih leh Assam Police in a camp an rawn nei nia langte chu a hmun ngeiah kalin, an enfiah nghal a ni. Mizoram lamin a 3rd Battalion MAP awm mekna piah lama kawng an laih mek chu ruah a sur avanga an chawlh rih thu zawhfiah niin, MZP chuan Assam Police lam in a an kawng sial chu August ni 9 a Assam leh Mizoram sawrkar nen a inbiakna awm leh hma chu hnathawh hi ti tawp rih tura hmala turin thuneitute an ngen bawk.

He hunah hian, MZP hruaitute hi Pu Victor Lalawmpuia, SDO leh Pu H. Lallunghnema, SDPO te'n an tawiawm a ni.

<><><>

EXCISE MINISTER

Excise & Narcotics Minister Pu Lalnghinglova Hmar chuan nimin khan Guwahati-ah Assam sorkar Excise Department hnuaia mi pawimawhte ruihhlo do chungchang a sawipui a, indawr zui zel bakah hmalak zel dan turte an rel.

Pu Lalnghinglova Hmar leh Assam Minister hi phone kalflanga inbiain hmalak dan turte an sawi dun a. Pu Lalnghinglova Hmar in State pahnih harsatna tawh mek chungchangah uluk zawka inbiakna neih tha a tih thu a hrih chu Assam Minister pawhin tha a ti a; Excise Department chauh ni lo Home Department aiawhte nen pawh sawihoa tanlak a tul thute an sawi dun a ni.

Assam Excise Minister ruahman angin Assam sorkara Excise Department Secretary Pu Indreswar Kalitaleh Commissioner of Excise Pu Jitu Doleyte nen ruihhlo do kawnga State pahnihte thawhho dan sawihoin inkawm zui bawk.

Pu Lalnghinglova Hmar chuan Myanmar atanga Heroine no. 4 lokal chu Assam huamchhungah siam danglamin 'Bagha Cap' ti a vuahin Mizoramah a lo luh leh thin thute, damdawi hman sual chi an tawlh luh thin dante leh Assam chhunga khaw thenkhatah ruihhlo zuarte an zalen hle ni a Mizoram atanga hriat a nih thute Assam Excise Department hotute hi a hrilh a ni.

Assam Excise Department hotute chuan Mizoram Excise Minister thusawite chu chhinchhiahin an bawhzui tur thu an sawi a. Hun remchang hmasa berah an Minister hova sawi hova an zirchian tur thu leh, Mizoram Minister rawtna anga state pahnihte ruihho do kawnga inkawm leh thuai tha an tih thute an sawi a ni.

<><><>

## LAWNGTLAI

Education Minister Dr.Vanlalhlana chu Lawngtlai District Students' Association hruaituten nimin khan a pisa ah hmu in, Lawngtlai District atanga High school Zirtirtu pathum sawnchhuah chungchang leh Kamalanagar Higher Secondary School a Lecturer indaihlohna chungchang bakah, Mualbu UPS building thli in a tihchhiat chungchangte an sawipui.

LDSA hruaitute chuan Education Minister hnenah hian, tun hnaiah Lawngtlai District chhunga High School pathum, Govt.Ramthar High School Lungpher South, Govt.High School Pangkhua leh Govt.Lai High School Vawmbuk atanga zirtirtu sawnchhuah te chu an aiawh dah an la nihloh thu leh, transfer te hi Mathematics Zirtirtute an nih avanga zirlai ten harsatna an tawh thu leh an aiawh dah tura ruahmanna awmthei te an sawipui a ni. Minister chuan naktuk August Ni.1 hian hemi chungchang bik sawitura School Education Director nen an meeting tur thu sawiin, karleh chhung chuan an aiawh tur dahfel hman an nih a beisei thu zirlai pawl hruaitute hi alo hrilh.

LDSA hruaitute chuan, sorkara anlo thlen thin Kamalanagar Higher Secondary School a thawk tur, Economics leh Education subject Lecturer te chu dah an nih hun tur leh, ruahmanna awm tawh te Minister hi zawtin an sawipui bawk a. Minister chuan ruahmanna siam vek anih tawh thu leh, August thla chawhmlamah Principal Council nen meeing an neih zawh ah order chhuah nghal tur anih thu te, joining report pawh order chhuah atanga ni 5 chhunga lecturer ten anlo pek tur thu LDSA hruaitute hnenah hian a lo hrilh bawk

LDSA hruaitute chuan Mualbu UPS school sakthat ngai chungchang pawh Education Minister hnenah hian sawi nghal in, tunah central ah SPD chu Samagra atanga school sakthatna tura pawisa awmtheite dila a thang mek thu Minister chuan sawiin, pawisa hmuh anih veleh sakthat tura zingah an telh tur thu a sawi.

<><><>

## LUNGLEI

TB Elimination Acceleration Project hnuaiah Zohnuai mipui te tan a thlawna inentirna hun hman a ni. Health camp ah hian khawl changkang (Cough AI application leh Handheld XRay) te hmangin TB screening neih a ni

a, HWC staff Zohnuai a thawktu ten BP check leh inentir te zingah Zunthlum vei an awm leh awm loh te an endik a ni. He health camp a inentir zat hi 120 an ni.

National TB Elimination Programme hian kum 2025 hmain TB natna umbo tumin hma a la mek a, chu umbona chu he TB Elimination Accelerator Initiation Project hian TB veite zawnchhuah beihpui hmanga puih chu a tum ber a ni. He Project hi Central TB Division, State TB Cell, District TB Centre, USAID, Stop TB Partnership, World Health Organization (WHO), Piramal Swasthya Management and Research Institute, Jhpiego leh Wadhvani AI te tangkawpin an kalpui a ni a. Mizoram hi TB Free kan nih theih na turin khawl changkang zawk - Cough AI application leh hand-held XRay machine te hmangin TB Screening Health Camp neih chhoh a ni dawn a. He Project hi India ram puma a hmasa ber atan Mizoram ah tan niin, Aizawl leh Lunglei district ah te tan phawt a ni a. He project hnuaia hmalakna te hi nakinah India rama state hrang hrang te tana entawn turin chhawpchhuah a ni dawn a ni.

<><><>

#### FISHERIES

Fisheries Department chuan Zawlnuam Fishery Co-operative Society Assembly Vawi 29-na Zawlnuam Vengpui ah nimin khan hman a ni a, he hun hi Fisheries Department Director Pi Laltpuiin a hmanpui a ni.

Fuihna thu sawiin Pi Laltpuii chuan sangha tharchhuah kawngah tun aia tan lak a ngaih nasa a, hma sawn ngei turin thu a chah a ni.

Director hian Zawlnuam a Fisheries Department Farm chu tlawhin, farm enkawltute kawmin hma lak zel dan tur a sawi pui a ni.

Hei bakah hian Zawlnuam Fishery Co-operative Society in Can- Industry a din chu a tlawh bawk a ni.

Hemi hma hian Dapchhuah YMA te kawmin, Fisheries Department hnuaia tanpuina a dawn atanga Fisheries Recreational Centre an siamna hmun tur te tlawhin hmalak dan tur a sawipui a. DFDO Office, Mamit chu a tlawh nghal bawk.

<><><>

#### TRAFFIC POLICE SENSITISATION

Aizawl-a Traffic Police-te tan Climate Change leh Human Health chungchangah Sensitization Training nimin khan buatsaih a ni a, he training-ah hian Traffic Police mi 80 bawr vel an tel.

He training NPCCHH State Nodal Officer Dr. Vanlalrengpui Chinzah chuan khawvelin a vei berte zinga mi Climate Change vanga harsatna thleng mek leh hriselna kawnga nghawng thui tak a neih theih thute sawiin, India ram chung ngeiah pawh heatstroke vanga nunna chan mi za chuang lai an lo awm tawh thu a sawi a, Traffic Police kal khawmte nena thupui nena inmil tur

zawnga hmalakna leh zir hona awm thei chu lawmawm a tih thu a sawi baw k a ni.

Aizawl Traffic Sr SP Pu Stephen Lalrinawma chuan Traffic Police kalphung leh harsatna awm thei laka hma an lak thin dan sawiin Traffic Police-te mahni inenkawl uluk leh zual turin a chah a. Hmun tam zawka chetsualna thleng thinah First Responder an nih fo thin thute a sawi a. Traffic police-te khaw lum lutuk ina an taksa a nghawng theih dan chungchangah zirtirna pe a training an buatsaihsak chu lawmawm a tih thu a sawi.

<><><>

#### UNION FINANCE MINISTER

Union Finance Minister Nirmala Sitharaman-i chuan Union Budget 2024-25 chuan hmasawna leh inrenchemna inbuktaw k takin a kalpui a ti. Nimina Rajya Sabha-a Budget sawihonaah he thu hi sawiin Pi Sitharaman-i chuan sawrkar laipui chuan state leh sawrkar laipui thuneihna inkhaidiata thawhhona chu a thlawp tlat tih a sawi a. Opposition lamin agriculture sector lama sum ren anga an puh chu thudik lo a ni a ti a. Education, employment leh skill development lamah cheng vaibelchhe nuai 1 sing li leh sang 8 dah anih thu a tarlang a. hei bakah hian chhiah tlingkhawm pawhin nasa takin hma a sawn a ni a ti baw k.

Pi Sitharaman-i chuan fiscal deficit chu 2025-26 ah zaa 4.5 a tihhniam a tum tih a sawi baw k a ni.

<><><>

#### UPSC

Union Public Service Commission-UPSC chuan dawta a nihna phuahchawp IAS training lai Puja Khedkar chu a ban bakah exam thei tawh lo turin a hrem. UPSC chuan thuchhuah siamin lehkhaw pawimawh neihte uluk taka an zirchian hnuah Khedkar-i hian Civil Service Examination-CSE Rules 2022 a bawhchhe ngei tih an finfiah a. Phal chin baka tam a exam theih nan a nihna phuahchawpa hma alak avangin UPSC chuan Khedkar-i hi insawifiah turin an lo ko tawh a. Thawhlehi thleng kha hun pek ni mahse chhanna a pelo niin UPSC chuan a tarlang a ni.

UPSC chuan kum 15 kalta chhunga CSE-a tlingte data uluk takin a ennawn leh vek tih a tarlang tel a. Phal chin aia tam tumah exam lui an awm lo tih a sawi a. Tuna buaina thleng ang hi a thlen tawh loh nan khauh takin hma lak a ni ang an ti baw k.

<><><>

#### PARIS OLYMPIC

Paris Olyumpic neih mekah India boxer Lovlina Borgohain chuan Norway boxer Sunniva Hofstad hnehin hmeichhe kg 75 category ah quarterfinal a lut. Lovlina Borgohain hian Pathianni khian Chinese boxer Li Qian a tum leh dawn a ni.

Archery hmeichhia ah Deepika Kumari chuan Dutch player Quinty Roeffen hnehin Round of 16 a lut a. Hmeichhe badminton-ah PV Sindhu chuan Estonia player Kristin Kuuba hnehin pre-quarterfinal a lut a. Badminton mipaah Lakshya Sen chuan World Number 4 Jonatan Christie hneihn Round

of 16 a lut ve bawk. Table Tennis-ah Sreeja Ankula chuan prequarterfinal a lut a ni.

<><><>